



Na osnovu člana 17. stav 1. i člana 44. stav 1. Zakona o Visokom sudskom i tužilačkom vijeću Bosne i Hercegovine („Službeni glasnik Bosne i Hercegovine“, br. 25/04, 93/05, 48/07, 15/08, 63/23, 9/24 i 50/24), a u vezi sa članom 61. i 62. Poslovnika Visokog sudskog i tužilačkog vijeća Bosne i Hercegovine („Službeni glasnik Bosne i Hercegovine“, br. 55/13, 96/13, 46/14, 61/14, 78/14, 27/15, 46/15, 93/16, 48/17, 88/17, 41/18, 64/18, 12/21, 26/21, 35/21, 68/21, 1/22, 26/23, 83/23, 9/24, 27/24 i 72/24), Visoko sudsko i tužilačko vijeće Bosne i Hercegovine (u daljem tekstu: Vijeće), u sastavu, tužilac Sanin Bogunić, predsjednik Vijeća, sudija Sanela Gorušanović Butigan i sudija Velimir Ninković, potpredsjednici Vijeća, te sudija Aleksandra Obradović, tužiteljica Bojana Jolović, tužiteljica Snježana Petković, sudija Izo Tankić, sudija Sedin Idrizović, prof. dr. Džamna Vranić, dr. sc. Davor Martinović, tužiteljica Željka Fabić, advokatica Elma Veledar Arifagić i advokatica mr. Duška Bogojević, na sjednici održanoj 18. i 19.06.2025. godine, donijelo je

RJEŠENJE

o imenovanju sudije Okružnog suda u Doboju

- I. Za sudiju Okružnog suda u Doboju imenuje se **Hajdarević Amela**.
- II. Datum stupanja na dužnost imenovane Vijeće će odrediti posebnom odlukom.

O b r a z l o ž e n j e

Na osnovu člana 36. Zakona o Visokom sudskom i tužilačkom vijeću Bosne i Hercegovine (u daljem tekstu: Zakon o VSTV-u BiH) i člana 33. i 34. Poslovnika Visokog sudskog i tužilačkog vijeća Bosne i Hercegovine (u daljem tekstu: Poslovnik VSTV-a BiH), Vijeće je na internet stranici dana 07.11.2024. godine objavilo javni konkurs pod brojem: 04-07-3-4035-1/2024, kojim je oglašena 1 (jedna) pozicija sudije Okružnog suda u Doboju, krivični referat.

Nakon provedene konkursne procedure, nadležno podvijeće je u skladu sa članom 59b. st. (1), (2), (4), (5) i (6) Poslovnika VSTV-a BiH izvršilo finalno rangiranje kandidata, te je Vijeću dostavilo rang listu kandidata sa obrazloženim prijedlogom za postupanje.

Razmatrajući zaključenu rang listu kandidata i utvrđeni broj bodova, kao rezultat ocjenjivanja svih kriterija propisanih Zakonom o VSTV-u BiH i Poslovnikom VSTV-a BiH, Vijeće je odlučilo da za 1 (jednu) poziciju sudije Okružnog suda u Doboju imenuje kandidatkinju na rang listi pod rednim brojem 3 Hajdarević Amelu iz reda bošnjačkog naroda, koja od 14.09.2011. godine, obavlja dužnost tužioca Okružnog javnog tužilaštva u Doboju.

Prethodno imenovanju na poziciju tužioca Okružnog javnog tužilaštva u Doboju, imenovana kandidatkinja je u periodu od 2007. do 2011. godine obavljala poslove stručnog saradnika u Okružnom javnom tužilaštvu u Doboju, u kojem tužilaštvu je u periodu od 2005. do 2007. godine bila i pripravnik-volonter.

Vijeće je, nakon ocjene stručne sposobnosti kandidatkinje zasnovane na dosadašnjim rezultatima u karijeri, sposobnosti pravne analize, komunikativnosti i sposobnosti prezentacije, sposobnosti kandidatkinje da odgovorno, nezavisno i nepristrasno obavlja funkciju sudije, uzimajući u obzir, između ostalog, dosadašnje radno iskustvo, profesionalnu nepristrasnost i ugled, ponašanje van posla, edukaciju i usavršavanje, objavljivanje stručnih i naučnih radova, te druge aktivnosti u struci i ocjene

kriterija podobnosti, ocijenilo da imenovana kandidatkinja u potpunosti ispunjava uslove za imenovanje propisane u članu 43. Zakona o VSTV-u BiH.

Prilikom imenovanja navedene kandidatkinje, Vijeće je u skladu sa članom 59b. stavak (5) tač. a), b), c) i d), a u vezi sa članom 61. Poslovnika VSTV-a BiH, kumulativno vodilo računa o broju ostvarenih bodova kandidata, okolnostima koje su relevantne za procjenu podobnosti kandidata iz člana 48a. ovog poslovnika, a posebno o potrebi osiguranja adekvatne nacionalne i spolne zastupljenosti u tužilaštvu, u smislu člana 43. stav (2) Zakona i radnom iskustvu kandidata u određenoj oblasti prava, s obzirom da je, u odnosu na sud u kojem se vrši imenovanje, utvrđena potreba za sudijom sa specifičnim radnim iskustvom na krivičnom referatu.

Vijeće je imalo u vidu da je imenovana kandidatkinja Hajdarević Amela u toku konkursne procedure, za kriterij stručnosti i sposobnosti pravne analize ostvarila ukupno 96 bodova od mogućih 100 bodova, dok je na razgovoru pred nadležnom komisijom Vijeća u pogledu drugih kriterija ostvarila ukupno 12,9 bodova od mogućih 20 bodova, što ju je u konačnici rangiralo na treće mjesto rang liste kandidata sa ukupno ostvarenih 108,9 bodova od mogućih 120 bodova.

Kriteriji stručnosti i sposobnosti pravne analize imenovane kandidatkinje, koja obavlja dužnost tužioca, utvrđeni su na osnovu ocjena rada za posljednje tri godine i to za 2021., 2022. i 2023. godinu, a računajući do dana isteka roka za podnošenje prijave po navedenom konkursu. Kandidatkinja je za navedene tri godine imala ocjene rada 4, 5 i 5. U skladu sa odredbama člana 56. stav 2. Poslovnika VSTV-a BiH, njenoj prosječnoj ocjeni rada za prethodne tri godine koja iznosi 4,7 dodijeljen je ekvivalentan broj bodova koji se koristi u konkursnoj proceduri od 96 bodova.

Ostali kriteriji, koji se odnose na sposobnost kandidatkinje da odgovorno, nezavisno i nepristrasno obavlja funkciju za koju se prijavila, profesionalne nepristrasnosti i ugleda, te ponašanja van posla, dosadašnjeg radnog iskustva, edukacije i usavršavanja, objavljivanja stručnih i naučnih radova, te drugih aktivnosti u struci i komunikativnosti utvrđeni su na razgovoru pred nadležnom komisijom Vijeća, kojom prilikom je svaki član komisije nezavisno bodovao kriterije, kako je to propisano u čl. 54., 54a., 54d., 54e. i 54f. Poslovnika VSTV-a BiH. Po ovom osnovu kandidatkinja je u konačnici ostvarila ukupno 12,9 bodova. Konačan broj bodova koje kandidat ostvari na razgovoru predstavlja prosjek zbira ocjena po kriterijima koji se ocjenjuju na razgovoru.

Pored ukupnog broja ostvarenih bodova, na osnovu kojih je kandidatkinja, u skladu sa čl. 59a. stav (1) tačka b) i 59b. st. (2) i (4) Poslovnika VSTV-a BiH, stekla uslove za predlaganje i imenovanje na poziciju sudije okružnog suda, Vijeće je vodilo računa o okolnostima koje su relevantne za procjenu podobnosti kandidata iz člana 48a. ovog poslovnika, kao i o potrebi osiguranja adekvatne nacionalne i spolne zastupljenosti u navedenom sudu, u smislu člana 43. stav (2) Zakona o VSTV-u BiH.

Za imenovanu kandidatkinju Vijeće je ocijenilo da ne postoje okolnosti koje izazivaju sumnju u pogledu njene podobnosti za poziciju za koju se prijavila.

Kada je u pitanju adekvatna nacionalna zastupljenost u konkretnom sudu ista je utvrđena na osnovu popisa stanovništva iz 1991. godine. Nacionalna struktura 12 sudija Okružnog suda u Doboju bi trebala biti: Bošnjaci (2,2), Hrvati (3,0), Srbi (5,9), Ostali (0,9). Dakle, trenutno u sudu nedostaje sudija iz reda hrvatskog naroda (-2,0), zatim bošnjačkog naroda (-1,2), pa onda srpskog naroda (-0,9), dok je kandidata iz reda ostalih (+1,1).

Prilikom odluke o imenovanju Vijeće je imalo u vidu i činjenicu da na rang listi nema kandidata iz reda hrvatskog naroda, zatim da, pored imenovane, na rang listi nema kandidata bošnjačkog naroda.

U skladu sa članom 62. stav (2) Poslovnika VSTV-a BiH, Vijeće je u odnosu na kandidatkinju na rang listi pod rednim brojem 1 odstupilo od rang liste i opredijelilo se za imenovanu kandidatkinju iz slijedećih razloga:

Vijeće je u konkretnom slučaju dalo prednost imenovanoj kandidatkinji pod rednim brojem 3 na rang listi, imajući u vidu njeno četrnaestogodišnje radno iskustvo na funkciji tužioca, odnosno nosioca pravosudne funkcije.

Nadalje, Vijeće je ocijenilo da kandidat pod rednim brojem 1 na rang listi ne posjeduje dovoljno iskustva u radu na krivičnom referatu, s obzirom da je trenutno raspoređen na građansko odjeljenje Općinskog suda u Lukavcu u koji sud je prvi puta imenovan za nosioca pravosudne funkcije 2019. godine.

Kada je u pitanju drugorangirana kandidatkinja ista posjeduje traženo iskustvo na krivičnom referatu, s obzirom da trenutno radi na krivično prekršajnom odjeljenju Osnovnog suda u Derventi, ali ne dolazi iz reda kandidata nedostajućih nacionalnosti, odnosno dolazi iz reda Ostalih (+1,1).

Okolnosti koje se tiču radnog iskustva prva tri rangirana kandidata iz određene oblasti prava utvrđene su na osnovu informacija pribavljenih na razgovoru sa kandidatima, u skladu sa članom 53. stav (11) Poslovnika VSTV-a BiH, te uvidom u službene evidencije Vijeća.

Imajući u vidu navedeno, Vijeće je ocijenilo da imenovana kandidatkinja pod rednim brojem 3. Hajdarević Amela posjeduje potrebno stručno znanje, kao i potrebno radno iskustvo, te da ispunjava sve uslove da obavlja poziciju sudije Okružnog suda u Doboju, a to posebno cijeneći njeno dosadašnje radno iskustvo koje je sticala u svojstvu tužioca Okružnog javnog tužilaštva u Doboju.

Uzimajući u obzir sve navedeno, Vijeće je kumulativno vodeći računa o svim okolnostima iz člana 59b. stav (5) tač. a), b), c) i d) i stav (6) Poslovnika VSTV-a BiH, ocijenilo da je imenovana kandidatkinja u potpunosti ispunila zakonom propisane uslove, kao i druge kriterije koji se cijene prilikom izbora kandidata, kako bi bilo imenovani na poziciju sudije Okružnog suda u Doboju.


U pogledu dijela rješenja o stupanju na dužnost imenovane, isto se odgađa do okončanja dodatne provjere iz člana 86c. Zakona o VSTV-u BiH, a u vezi sa članom 19. stav (3) Pravilnika Visokog sudskog i tužilačkog vijeća Bosne i Hercegovine u vezi s izvještavanjem o imovini i interesima („Službeni glasnik BiH“ br. 20/24 i 57/24), odnosno do okončanja upravnog spora ukoliko je pokrenut protiv rješenja o imenovanju.

Ovo rješenje će biti objavljeno na internet stranici Vijeća, shodno članu 44. stav (1) Zakona i članu 62. stav (4) Poslovnika VSTV-a BiH, uz naznaku datuma objave od kojeg počinje teći rok za podnošenje tužbe.

Imajući u vidu sve iznesene razloge, Vijeće je odlučilo kao u izreci ovog rješenja.

Pouka o pravnom lijeku: Protiv ovog rješenja može se pokrenuti upravni spor pred Sudom Bosne i Hercegovine u roku od osam dana od dana objavljivanja rješenja o imenovanju na internet stranici Vijeća.

Broj: 04-07-3-2200-1/2025
Datum: 19.06.2025. godine

The stamp is circular with a blue border. Inside the border, the text 'BOŠNANSKO-HERCEGOVINSKO SUDSKO-TUŽILAČKO VIJEĆE' is written in a circle. In the center of the stamp, there is a smaller circle containing the letters 'MP'. To the right of the stamp, the text 'Predsjednik VSTV-a BiH' is printed, followed by a handwritten signature in blue ink.

Predsjednik VSTV-a BiH
Sanin Bogunić

